



Il Chor viril Domat ha organisà bain la radunanza da delegads ed er dà a quella il vestgi cantic.

FOTOS G. N. STGIER

Emprima dunna sco presidenta

Uniun chantunala da chant dal Grischun

DA GION NUTEGN STGIER / ANR

■ En sia istorgia da 164 onns ha l'uniun che reunescha chantadurs e chantaduras da noss chantun per l'emprima giada ina dunna sco presidenta. L'onur d'exequir da nov quel uffizi ha Lucretia Bärtsch. Ella suonda a Retus Giger ch'è stà ils davos 13 onns al timun da l'uniun. La vischnanca da Domat ha purschì tetg als delegads e las delegadas dals 130 chors ch'appartegnan a l'Uniun chantunala da chant dal Grischun. Organisà l'occurrènza ha il Chor viril Domat. Sut la direcziun da *Sergei Schmid* han ils 20 umens da quel chor er dà il vestgi cantic a la radunanza e quei cun chanzuns en tuts trais linguatgs grischuns. Beneventada è la raspada er vegnida da *Ludwig Coray*, il president dal Chor viril Domat. «La cultura è quella che dat a la vischnanca la marca singulera e tar quella tutga er il chant», ha ditg *Beatrice Baselgia*, la presidenta communal da Domat en ses pled cordial da bainvegni.

Realisà sias visions

Tar la radunanza da delegads a Riom il mars 2015 aveva *Retus Giger* annunzià che en in onn saja propi finì cun ses uffizi da president. A Domat ha el lura er fatg ina retrospectiva da ses 13 onns sco president da l'Uniun chantunala da chant dal Grischun. Ils numerus inscunter cun chantadurs e chantaduras sajan adina

stads empernaivels. Las bellas regurdientschas a las festas da chant districtualas, chantunals e federalas restan per vita duranta. Ses motto saja adina stà: Avair visions e realisar visions. En quels 13 onns che Giger è stà al timun da l'Uniun chantunala da chant dal Grischun è tranter auter vegnì fundà il Chor da giuvenils grischun, oz in dals megliers chors en Svizra, introduci tar las festas da chant il discurs cun ils experts e lura er il forum da chors.

Retus Giger da nov president d'onur

Il president partent ha lura er engrazià al chantun e cunzunt ad *Armon Fontana* dal departament da cultura per la collavuraziun excellenta durant ils davos 13 onns. Laud per sia lavur exemplarica a favur dal chant ha er retschet da *Retus Giger Giuseppe Giuanin Decurtins* da Radio Television Rumantscha. Per ses engaschament a favur da l'Uniun chantunala da chant dal Grischun è Giger vegnì nominà sco president d'onur e sco segn da respect èn tuts preschents sa salzads da las sutgas. En quels onns sco president ha el gi cun sia dunna *Regula Giger* in grond sustegn, uschia che er ella ha retschet la commembranza d'onur da l'Uniun chantunala da chant dal Grischun.

Ina dunna cun relaziuns tar il chant

Elegi cun in ferm applaus sco emprima presidenta da l'Uniun chantunala

da chant dal Grischun han ils preschents *Lucretia Bärtsch* da Malans. Grazia a l'uniun sajan s'avridas per ella bleras portas sin il champ da musica e da chant e perquai surpiglia ella gugent e cun plaschair quel uffizi. Bärtsch è dirigenta, chantadura, musicista, scolasta da musica, ella ha gia fatg part da la cumissiun da musica ed a la suprastanza da l'uniun che reunescha chantadurs e chantaduras da noss chantun.

29 veterans federals – 52 veterans chantunals

Da preschent ha l'Uniun chantunala da chant dal Grischun 4098 commembers e commembras, 74 damain che anc avant in onn, che derivan da 128 chors. In act festiv tar la radunanza è er adina l'undrientscha dals veterans e da las veteranas. Ils chors vivan da la fidaivladad da chantaduras e chantadurs e tuts hajan er in grond merit per la vita sociala e da cuminanza en las vischnacas, ha ditg Giger.

Undrads èn vegnids a Domat 29 chantadurs e chantaduras per lur commembranza da 35 onns en in chor e dapi sonda èn tuts veterans federals. 52 umens e dunnas èn da nov veterans chantunals cun chantar dapi 30 onns en in chor. La proxima radunanza da delegads da l'Uniun chantunala da chant dal Grischun ha lieu il mars 2017 ad Igis.

Benvenuti a Chiavenna!

La 26avla Festa da chant chantunala 2018 ha betg lieu forsa a Flem, Cui- ra, Tavau, Scuol ubain Savognin, na,

ella ha lieu a Chiavenna. Per l'organisaziun da quella segna il Chor viril Samedan cun *Jon Fadri Huder* sco pre-

sident dal comité d'organisaziun. L'idea da realisar l'occurrènza da chant en Valtellina il zercladur 2018 ha cunzunt er chattà in grond resun tar ils amis da chant da Chiavenna. Al comité d'organisaziun appartegna lura er *Omar Iacomella*, il «sindaco» da Piuro e dirigent dal «Coro Eco del Mera». Sa mussà ventiraivel da l'idea d'unir ils chors da la Valtellina cun quels dals Grischun è er *Luca della Bitta*, il mastral da Chiavenna e president da la provinza Sondrio. «Benvenuti a Chiavenna» ha el ditg a Domat e retschet persuerter in ferm applaus. Cun avair lieu la proxima festa da chant en l'Italia va l'Uniun chantunala da chant dal Grischun ina giada dapli novas vias, ina via che fa plaschair a blers e gia dus onns avant sa legra la famiglia da chant grischuna sin l'inscunter cun noss amis da chant talians. Viva la Valtellina e Viva il Grischun.




Trais presidents communsals e trais umens cun ina finamira. Organisar la proxima Festa da chant chantunala 2018: Jon Fadri Huder, Samedan, Luca della Bitta, Chiavenna ed Omar Iacomella, Piuro (da san.).

FOTO G. N. STGIER



Set dunnas dal Chor mischedau Laax èn vegnidas undradas sco veteranas chantunals: Paulina Arpagaus, Imelda Derungs, Marionna Tschuor, Natalia Gliott, Rita Bass, Carlina Caviezel e Jolanda Camathias (da san.).



Beatrice Baselgia, la presidenta da la vischnanca da Domat, dat cun Ernst Collenberg, l'antier president e president d'onur da l'Uniun chantunala da chant dal Grischun, in egl en il cudesch da Domat.



Sa drizza als delegads è er Claude-André Mani, il president central da l'Uniun svizra dals chors.



Sa legra da sia undrientscha sco nova commembra d'onur da l'Uniun chantunala da chant dal Grischun: Regula Giger.



Omadus èn presidents da dus chors da vaglia: Victor Blumenthal, Chor viril Lumnezia e Flavio Murer, Chor viril Ligia Grischa (da san.).



Heinz Girschweiler, il president da la cumissiun da musica da l'uniun da chant da noss chantun.